

**NO SOALAN : 49**

**PEMBERITAHU PERTANYAAN DEWAN RAKYAT**

**PERTANYAAN : LISAN**

**DARIPADA : DATUK NOOR EHSANUDDIN BIN  
MOHD HARUN NARRASHID  
(KOTA TINGGI)**

**TARIKH : 22.03.17  
(RABU)**

**SOALAN:**

Minta **MENTERI PERTAHANAN** menyatakan adakah Kerajaan bercadang untuk membuat kajian semula, tempoh perkhidmatan anggota tentera wajib selama 21 tahun dan memansuhkan "option" persaraan awal.

## **JAWAPAN:**

Tuan Yang di-Pertua,

Kajian semula Terma-Terma dan Syarat-Syarat Perkhidmatan ATM telah dilaksanakan sejak tahun 2010 dan diluluskan Kerajaan berkuat kuasa 1 Januari 2013. Peraturan-Peraturan Angkatan Tetap (Terma-Terma dan Syarat-Syarat Perkhidmatan ATM) 2013 sedia ada masih relevan dan memenuhi keperluan perkhidmatan ATM semasa.

Tempoh perkhidmatan sedia ada Anggota Lain-Lain Pangkat ATM boleh dilanjutkan secara berperingkat sehingga umur 55 tahun. Tempoh perkhidmatan secara berperingkat bertujuan agar Anggota Lain-Lain Pangkat yang hilang minat untuk meneruskan perkhidmatan dapat menamatkan perkhidmatan dengan cara baik.

## PEMBERITAHUAN PERTANYAAN DEWAN RAKYAT

**PERTANYAAN : LISAN**  
**DARIPADA : DATO' HAJI MOHD ZAIM BIN ABU HASAN**  
**TARIKH : 22.3.2017**  
**SOALAN : NO. 50**

**Dato' Haji Mohd Zaim Bin Abu Hasan [ Parit ]** minta **MENTERI PENDIDIKAN TINGGI** menyatakan apakah punca dan penolakan permohonan Quest University International Perak (QUIP) untuk menambah pelajar sedangkan universiti ini yang turut dimiliki pegangan sahamnya oleh Kerajaan Negeri telah memenuhi semua kriteria dan keperluan Kementerian dari semasa ke semasa tanpa prejudis dan campur tangan politik.

### JAWAPAN

Tuan Yang di-Pertua,

Untuk makluman Ahli Yang Berhormat, Quest University International Perak (QUIP) telah diluluskan oleh Jawatankuasa Teknikal Bersama Majlis Perubatan Malaysia bagi tambahan kuota pelajar program perubatan dari 50 orang kepada 75 orang pada tahun 2015. Manakala permohonan kedua oleh QUIP bagi penambahan kuota pelajar program perubatan sebanyak 100 orang adalah tertakluk kepada Moratorium Penawaran Program Perubatan Baharu Institusi Pendidikan Tinggi dari tempoh 1 Mei 2016 hingga 30 April 2021. Melalui moratorium ini tiada program perubatan yang baharu di peringkat ijazah sarjana muda dan tiada penambahan kuota pengambilan pelajar program perubatan di peringkat ijazah sarjana muda.

Untuk makluman Ahli Yang Berhormat juga, kawal selia kualiti program perubatan dipantau oleh Agensi Kelayakan Malaysia (MQA), Majlis Perubatan Malaysia (MMC), Persatuan Perubatan Malaysia dan Kementerian Kesihatan Malaysia bertujuan untuk mengekalkan kualiti graduan. Pengambilan pelajar bagi program perubatan oleh sesebuah Institusi Pendidikan Tinggi Swasta termasuklah QUIP adalah berdasarkan keperluan guna tenaga negara dan keupayaan sesebuah institusi untuk mengendalikan sesebuah program.